

中州名賢集



中州名賢集



國朝中州名賢集目錄

卷上之一

夏峯孫先生事略

夏峯孫先生語錄

卷上之二

潛庵湯先生事略

潛庵湯先生語錄

卷上之三

逸庵耿先生事略

逸庵耿先生語錄

卷中之一

仲誠張先生事略

仲誠張先生語錄

卷中之二

禮山李先生事略

禮山李先生語錄

卷中之三

敬庵張先生事略

敬庵張先生語錄

卷中之四

靜庵竇先生事略

靜庵竇先生語錄

卷下之一

蟬庵舟先生事略

蟬庵舟先生語錄

卷下之二

文園李先生事略

文園李先生語錄

卷下之三

艮峯倭先生事略

艮峯倭先生語錄

仲卷末

附錄

博陵尹先生事略

簞山田先生事略

春山郭先生事略

楚南湘潭後學黃舒昂編輯

國朝中州名賢集卷上之一

孫夏峯先生

先生諱奇逢字啟泰一字鍾元直隸容城人晚講學蘇門之夏峯學者稱夏峯先生少與定興鹿忠節公善繼友以聖學相砥礪年十四謁楊尙寶補庭補庭問設在圍城中內無儲峙外無救援當若何先生應聲曰效死勿去補庭忠愍公子也十七舉萬厯庚子鄉試居京師與左忠毅公光斗魏忠節公大中周忠介公順昌相尙以氣節丁內外艱喪葬一準古禮率兄弟廬墓凡六年學使李蕃以純孝疏旌其門家故貧日食常不繼嘗與

鹿忠節論學自辰至日昃始得豆麪作羹怡然無不足之色自言從憂患困鬱中默識心性本原生平得力實在此天啟五年逆閹魏忠賢亂政大興鉤黨獄左忠毅魏忠節周忠介先後被逮左公弟光明魏公子學伊皆主鹿氏鹿忠節之父正世所稱鹿太公者也與先生及新城張果中各出身營救當是時高陽孫文正公承宗以樞輔督師榆關鹿忠節以職方郎贊軍事初嘗約先生至軍中徧覽山海形勝孫公將疏請任以贊畫先生語茅元儀曰古未有將相不合能立功於外者公信不愧吉甫矣奈時不可何乃辭歸至是爲書抵孫公使季

弟奇彥及正孫化麟齋以往書略曰左魏諸君子清風
大節必不染指以庇罪人此何待言獨以善類之宗直
臣之首橫被奇冤自非有胸無心誰不扼腕惟桑與梓
固浮邱舊泣地也遺愛在人不止門牆之上興歌黃鳥
昔盧次楨一莽男子耳謝茂秦以眇布衣行哭燕市謂
元美等曰諸君子不生爲盧氏乃從千載下哀湘而
弔賈乎李獻吉在獄何仲默致書楊遷菴求爲引手康
德涵義激同調至不自愛其名浮邱廓園之品固當直
蹈獻吉何次楨之敢望某無能哭訴尙負慚於茂秦執
事功德前無遂菴憐才扶世之感稍一引手且有出德

涵上者況諸君子以道義臭味之雅受知於執事最深
且久豈無意乎孫公得書具疏請入朝面陳機務忠賢
大懼謂且興晉陽之甲夜遶御牀泣遂以嚴旨遏諸途
尋誣左魏受熊經略贓各榜追之左嘗督學三輔又治
屯田有惠政先生與鹿太公及果中謀設匭建表於門
曰願輸金救左督學者聽於是設匭者雲集得金數千
齎入都而左魏已先斃杖下明年忠介公逮至擬贓五
千先生復爲營畫得金數百而忠介復杖斃矣乃皆經
紀其喪且按籍還金時邏校嚴急士大夫觸手糜爛容
城去京師不二百里舉旛擊鼓眾皆爲先生危而忠賢

左右皆近畿人夙重先生質行無不陰爲之地者以故卒免禍左魏遺骨藉以歸海內有范陽三烈士之稱謂先生及正果中也先生義聲振一世御史黃宗昌給事中王正志交薦之屢徵不起崇禎九年大清兵薄容城先生率兄弟族黨入城與有司及薦紳分城守禦先生獨領西北隅雉堞久圯兵突至隨禦隨築鄰邑多陷而容城獨完巡撫張其平上其事詔優秩擢用會南都兵部尙書范公景文亦以贊畫軍務馳聘先生俱辭之時畿內盜賊數駭先生率弟子門人入易州五公山結茅雙峯戚族相依者數百家乃飭戎器峙糗糧部署守

樂又以其暇賦詩習禮絃歌聲相聞寇盜屏跡時以方
田子春之在無終山焉 國朝順治初祭酒薛公所蘊
具疏讓官以許文正相擬遂有 旨以國子監祭酒徵
有司敦趣卒固辭兵部侍郎劉公餘祐巡按御史柳寅
東陳蜚交章薦皆堅卧不應白有明及 本朝前後十
一徵不起天下士識與不識皆稱曰徵君晚歲渡河慕
蘇門百泉之勝且爲康節魯齋講學地水部郎馬光裕
奉以夏峯山廬遂移家築堂曰兼山讀易其中率子弟
躬耕四方來學願留者亦授田使耕所居成聚公卿持
使節過衛源輒屏騶從以一見先生爲快而睢陽湯文

正公斌官嶺北道告養歸遂從受業凡十年先生講學
不立門戶能通朱陸兩家之畛域其持身務自刻砥而
與人無町畦每晨起謁先祠畢澄心端坐雖疾病未嘗
有愠容有問學者隨其高下淺深必開以性之所近使
自力於庸行上自公卿大夫下及野人牧豎工商隸圉
武夫悍卒壹以誠意接之用此名在天下而人無忌嫉
者山中花放鄰村爭置酒相邀咸知愛敬居夏峯二十
五年卒年九十有二康熙十四年四月二十一日也先
生嘗語學者吾始自分與楊左諸賢同命及涉亂離犯
死者數矣而終無恙是以學貴知命而不惑也其學以

慎獨爲宗而於人倫日用間體認天理嘗言喜怒哀樂
中節視聽言動合禮子臣弟友盡分乃終身行之不能
盡者又言自七十以往每閱十年而功加密惟獨知之
地不敢自欺無或懈而已著有四書近指讀易大旨尙
書近指理學宗傳家禮酌歲寒居答問孝友堂家乘譏
輔人物考中州人物考取節錄孫文正年譜乙丙紀事
夏峯集諸書河南北學者歲時奉祀百泉書院易州學
者就故宅爲雙峯書院而容城與劉靜修楊忠愍祠祀
保定與孫文正鹿忠節並祀道光八年

詔從祀孔子廟庭弟奇彥順治中以貢生知武城縣有

聲子六四子博雅最知名孫淦康熙壬戌進士官中書
以孝聞子孫五世繞膝者三十餘人

尹子會一曰先生之學或以兼通陸王爲疑然考其
生平隨時隨事體認天理而功歸慎獨遊其門者高
明沈潛成德達材如羣飲於河各充其量蓋有非一
曲所能測其涯涘者至周旋左魏諸公之難壹似氣
節之爲而卒遠於禍觀其在白溝邂逅浮邱語闇闇
心氣和平雖緹騎環伺莫能乘其隙毋亦見其大則
心泰而誠至則物自無忤焉者乎然則先生之養可
知矣

楚南湘潭後學黃舒昂編輯

國朝中州名賢集卷上之一

夏峯孫先生語錄

學問不長進只爲眼前看得沒趣味故冷冷淡淡不肯下手做工夫若真如饑而食渴而飲自然住足不得
問夢寐之間常多驚擾曰爾室有愧夢魂難慊此正戒懼之疎耳家貧覘力量夜夢驗工夫曰宜三復
問做人曰饑餓窮愁困不倒聲色貨利浸不倒死生患難考不倒人之事畢矣

問孝友爲政余曰孟子親長而天下平正謂此試看孝友人家一室雍睦草木欣榮不孝不友之家恣睢乖戾